

IKINYARWANDA

Itariki 19/06/2024

Isaha : saa munani-saa kumi
(14h00-16h00)



IKIZAMINI GISOZA IGIHEMBWE CYA 3

IKICIRO:

AMASHURI ABANZA

UMWAKA WA:

KANE (P4)

IGIHE KIMARA:

amasaha 2

AMANOTA:

..... /50

CA-MIS

..... /80

AMABWIRIZA

1. Ntufungure iyi kayi y'ibibazo by'ikizamini utabiherewe uburenganzira.
2. Ikizamini kigizwe n'ibibazo cumi na bitanu (15). Mbere yo gutangira banza ugenzure niba ibyo bibazo byuzuye n'amapaji yose yuzuye.
3. Ikizamini kigizwe n'ibice bine:
 - Igice cya mbere: Kumva no gusesengura umwandiko (amanota 15)
 - Igice cya kabiri: Ikibonezamvugo (amanota 10)
 - Igice cya gatatu: Ubumenyi rusange bw'ururimi (amanota 15)
 - Igice cya kane: Ihangamwandiko (amanota 10)
4. Ibisubizo bigomba kuba bifututse kandi byuzuye.
5. Gusiribanga no guhindagura ibisubizo bifatwa nko gukopera.
6. Subiriza mu mwanya wagenwe.
7. Koresha ikaramu y'ubururu cyangwa iy'umukara gusa.

INZOVU N'UMUBU

Umunsi umwe, inzovu rubunga yari irimo kurisha mu ishyamba, igenda isakuma ibiti n'amashami isuka mu nda yayo. Kera kabaye iza kugera ku gihuru umubu wari watereyemo amagi yawo, amaze kwituraga, utwana twawo twuzuye igihuru cyose.

Igishingamo umugobora wayo, umubu urahunga ugwa ku ishami ryari hejuru yayo urayitakambira uti : « Rwose, nyakugira Imana mu Rwanda, ntunyicire abana»! Inzovu kubera ubusambo bwayo ntiyumva ijwi ry'umubu riyitakambira, igihuru iragisakuma, irunda mu nda yayo. Umubu ubibonye urarakara, urahaguruka uduhirira ku gutwi kwayo n'uburakari bwinshi. Aho bigeze Nzovu arumva, noneho abona gutega amatwi. Umubu, uyibwirana uburakari, uti : « Wa gisahiranda we ! Unyiciye abana, ariko umenye ko n'ubwo uri kinini bwose, turwanye nakurimbura »! Inzovu ireba umubu n'uburakari maze isubizanya agasuzuguro, iti : « Vuga uvuye aho wa kantu we ! N'iyi ngano yawe, n'iyi ndeshyo yawe, ugatinyuka ngo narwana nawe ! » Nuko inzovu itungaye umugobora wayo ngo igahitane, ariko karitaza, kagwa ku ishami rindi, maze karayibwira kati : « Ubwo unshojeho urugamba, witegure uyu mugoroba ndagutera, maze turebe umugabo»! Inzovu na yo irasubiza iti : « Uze wa gasimba gahora kaduhira we, maze nkurimbure, uve ku isi burundu, dore ko n'ubundi usanzwe wanzwe, kuko uri uwo gutera indwara gusa»!

Umubu uti : « Niba rero wiyemeje kurwana nange, nge ndwana nijoro kandi nsange watyaje inkota yawe, kuko ari zo turarwanisha ! Nibirimba turafatana mu maboko, turebe imbwa n'umugabo. Niba wumva uri umugabo kandi ubwire umugore n'abana bawe babe hafi, bakogeze, nakugaragure bareba.

Umugoroba ugeze, inzovu irataha n'umujinya mwinshi igera mu rugo yitotomba igira iti: «Ubona imbwa y'umubu ngo insuzugure! Madamu, mpereza iyo nkota yange nyicisha ku ibuye, maze uhamagare abana muze murebe aho nicisha umubu inkota; hato hatazagira n'undi unkomokaho uzongera gusuzugurwa n'agasimba kaduhira».

Nzovu amaze gutyaza inkota ye atangira kuyikaraga maze ahamagara umubu ati : «Uri he wa kantu ngo ngusaturemo kabiri nge kwiryamira ». Umubu wari

wahageze kare wigwira ku gikingi k'irembo kwa Nzovu. Nuko urasubiza uti : « Ubu ndi ku ijosi ry'umugore wawe wa kirumbo we! » Reka mbanze ngupfakaze maze tubonane!»

Inzovu ibyumvise irarubira, yegura inkota, irihanukira no ku ijosi ry'umugore wayo ngo: « Paaa ! » Igikanu igicamo kabiri, ibona umugore aragaragurika, maze umujinya urushaho kuyica. Yongera guhamagara umubu iti: « Uri he noneho wa kontazi we ngo nkugaburire ibisiga?» Umubu urasubiza uti: «Ntundeba wa gihararumbo we! Ndi ku nda y'umuhungu wawe, reka mbaze mupfomore inda maze nze tubonane! » Inzovu ibyumvise iryinyo irishinga ku rindi, inkota iyifatisha amaboko yombi, maze irahuruduka no ku ruda rw'imfura yayo irarwahuranya, ibiti n'ibyatsi yari yasakumye byuzura imbuga».

Inzovu ibibonye ita amarira, ariko yiha akanyabugabo, iti : «Noneho urihe wa kantu we ngo nkutire umujinya»! Umubu usubiza n'agatwenge noneho uti: «Nakugezeho nyaguhona we, ntundeba ku rwano rwawe, reka nitonde maze ngusogote»! Noneho inzovu irihanukira, inkota iyifatira mu keragati, iyishinga mu rwano, yiyahuranya ibihaha. Nuko ibura ubuhumeka igwa intagarane, itangira guhumekera mu rubavu. Nuko umubu usiga igaragurika, ariko uyishongoraho uti : « Ntumbonye se kandi wa gihararumbo we! Ndizera ko umenye ko ubugabo atari ubutumbi».

IGICE CYA MBERE: KUMVA NO GUSESENGURA UMWANDIKO (amanota 15)

1) Uyu mwandiko ni bwoko ki? Sobanura igisubizo cyawe. **(amanota 3)**

.....

.....

.....

2) Ukurikije umwandiko: **(amanota 3)**

(a) Kubera iki umubu watangiye utonganya inzovu?

.....

(b) Ubona ari iyihe mpamvu umubu wiyemeje kurwana n'inzovu kandi bitanganya imbaraga ?

.....

.....

(c) Erekana impamvu umubu wabwiye inzovu ngo nibijya kurwana umugore n'abana babe bari hafi.

.....
.....

3) Erekana ibintu inzovu yishe n'inkota ishaka kwica umubu. **(amanota 3)**

.....
.....

4) Sobanura amagambo akurikira yakoreshejwe mu mwandiko: **(amanota 3)**

(a) Umugobora:

(b) ngusogote:

.....

(c) igwa intagarane:

.....

5) Andika imigani y'imigenurano itatu wacira inzovu ukurikije ibyo yakoze.

(amanota 3)

.....
.....
.....

IGICE CYA KABIRI: IKIBONEZAMVUGO (amanota 10)

6) Garagaza uturemajambo tw'ijambo ritsindagiye mu nteruro ikurikira:

(amanota 3)

Nta munyeshuri ugomba gusiba adafite **impamvu**.

.....

7) Vuga umumaro w'amagambo atsindagiye mu nteruro zikurikira.

(amanota 3)

(a) Mama yaguze **imyenda**.

.....

(b) Umwarimu wacu **arakosora** impapuro.

.....

(c) **Gatete** akunda umupira w'amaguru.

8) Uzurisha indangahantu zikwiye mu nteruro zikurikira: **(amanota 2)**

(a) Shyira iyo sahane meza.

9) Kamana agiyeKabgayi mu misa.

10) Vuga ubwoko bw'interuro zikurikira: **(amanota 2)**

(a) Ihute vuba ubanguke udakererwa.....

(b) Kaneza yiga mu mwaka wa kane.....

IGICE CYA GATATU: UBUMENYI RUSANGE BW'URURIMI (amanota 15)

11) Vuga ubwoko bw'imvugo zikurikira : **(amanota 3)**

(a) Ndi nyamugenda mu bimbere singenda mu b'inyuma ni nge nyambo yogeye!

(b) Nyiramakangaza ngo mutahe!

(c) Akarenze umunwa karushya ihamagara.

12) Ica ibisakuzo bikurikira: Sakwesakwe! **(amanota 3)**

(a) Turaye ubuzima zumye!.....

(b) Ngesa bumera!.....

(c) Bihogo bya Birahinda ntitanga iratiza !.....

13) Andika umugani w'umugenurano ufatiye ku bikurikira : **(amanota 3)**

(a) Ubupfura

(b) Ineza

(c) Inda

14) Tanga ingero eshatu (3) z'amagambo y'impuzashusho. **(amanota 3)**

15) Garagaza ahantu hatatu hashobora gukoreshwa inyuguti nkuru mu myandikire yemewe y'Ikinyarwanda. **(amanota 3)**

IGICE CYA KANE: IHANGAMWANDIKO (amanota 10)

16) Andika akandiko kagufi katarengeje imirongo cumi n'itanu, uvuga ibiribwa n'ibinyobwa binyuranye wategurira icyarimwe kugira ngo ube uteguye indyo yuzuye. **(amanota 10)**

IHEREZO

Ipaji ya 6 kuri 6